



Kerajaan teliti insentif bantu rakyat terkesan kenaikan harga tiket penerbangan

November 17, 2023 @ 1:12pm

Oleh Mohd Roji Kawi

mdroji@bh.com.my

KUCHING: Kerajaan sedang meneliti langkah untuk menyediakan insentif bagi mengurangkan beban rakyat berikutan peningkatan harga tiket penerbangan khususnya menjelang musim perayaan.

Timbalan Menteri Pengangkutan, Datuk Hasbi Habibollah, berkata peningkatan harga tiket penerbangan itu sukar dielak berikutan peningkatan tukaran mata wang berbanding Ringgit Malaysia selain kenaikan harga bahan api.

Justeru, katanya kerajaan sedang meneliti langkah perlu bagi mengurangkan kesan terhadap rakyat yang memerlukan penerbangan antara dua wilayah, Sarawak- Semenanjung atau Sabah-Semenanjung pada musim perayaan dan cuti hujung tahun.

"Isu kenaikan harga tiket penerbangan ini berlaku setiap musim perayaan disebabkan beberapa faktor.

"Sehubungan itu, kerajaan sedang meneliti langkah untuk menangani kenaikan harga tiket penerbangan pada musim perayaan dengan menyediakan insentif bagi meringankan beban rakyat kita yang bergerak antara wilayah," katanya.

Beliau berkata demikian pada sidang media selepas Majlis Perasmian Pengoperasian Radar di Bawah Projek Penggantian dan Menaiktaraf Sistem Pengurusan Trafik Udara Sabah dan Sarawak (KKFIR) di Stesen Radar Pihak berkuasa Penerbangan Awam Malaysia di sini, hari ini.

Semakan mendapati, dalam tempoh dua minggu terakhir tahun ini mendapati harga tiket antara Kuala Lumpur-Kuching dan sebaliknya harga tiket penerbangan melonjak antara RM480 hingga RM573 sehala.

Sementara itu, Hasbi berkata kerajaan sedia mempertimbangkan untuk meneruskan pemberian bantuan subsidi pembelian tiket penerbangan untuk pelajar institut pengajian tinggi (IPT) tahun depan.

Beliau berkata, ketika ini pihaknya sudah memohon peruntukan bagi melaksanakan inisiatif untuk meringankan beban pelajar untuk bergerak antara wilayah.

Menurutnya, tahun ini seramai 56,000 pelajar menikmati inisiatif itu dan jumlah sama dijangka akan menerima apabila permohonan untuk melanjutkan subsidi itu tahun depan diluluskan.

"Sekarang sudah menghampiri penghujung tahun dan bermakna subsidi tahun ini juga sudah dimanfaatkan oleh 56,000 pelajar.

"Justeru, kerajaan bercadang untuk meneruskan pemberian subsidi pembelian tiket penerbangan itu untuk siswa kita," katanya.

Hasbi berkata, bantuan subsidi pembelian tiket penerbangan itu dinikmati semua pelajar dari Semenanjung yang akan melanjutkan pelajaran di IPT di Sabah dan Sarawak serta pelajar Sabah dan Sarawak yang melanjutkan pelajaran di Semenanjung.

Mengenai proses pengambilalihan syarikat penerbangan MASwings oleh kerajaan Sarawak, beliau berkata, perbincangan masih dijalankan antara Khazanah Nasional, kerajaan Sarawak dan Kementerian Pengangkutan.

"Antara perbincangan itu ialah berkaitan laluan penerbangan serantau kerana sebelum ini MASwings hanya menyediakan perkhidmatan udara luar bandar di Sabah serta Sarawak.

"Keputusan perbincangan itu dijangka dimuktamadkan tidak lama lagi," katanya.

Terdahulu, ketika berucap pada majlis berkenaan, beliau berkata projek KKFIR dengan peruntukan sebanyak RM183 juta melengkapkan sistem pengawasan radar dan liputan ruang udara secara menyeluruh di Sarawak dan Sabah.

Menurutnya, di bawah skop projek KKFIR itu, kerajaan meluluskan kerja menaik taraf sistem trafik udara dengan pemasangan peralatan trafik udara seperti Primary Surveillance Radar/Secondary Surveillance Radar (PSR/SSR) dan Automatik Defendent Surveillance-Broadcast (ADS-B).

"Projek itu antaranya penggantian radar di Kuching dan Kota Kinabalu, penggantian peralatan komunikasi di Miri, penggantian automasi pengurusan trafik udara di Kuching, Kota Kinabalu, Sibu, Tawau dan Miri," katanya.